

Noreg – eit av dei rikaste landa i verda

Kva meiner vi med at Noreg er eit av dei rikaste landa i verda?

AV EIVIND TORGERSEN | PUBLISERT 27 MAI 2025

Bilde av det norske flagg, med norsk natur, fjell og fjord om sommeren i bakgrunnen

Kan vi seie at Noreg er eit av dei rikaste landa i verda? Foto: Shutterstock

Noreg er eit lite land. Det bur berre fem millionar menneske her. Likevel blir Noreg ofte kalla for eit av dei rikaste landa i verda.

Det er ikkje fordi vi har mest pengar av alle land i verda. Vi har til dømes mykje mindre enn store land som USA og Kina. Men dei skal dele verdiane på mange fleire enn oss. I USA bur det meir enn 300 millionar menneske. I Kina over ein milliard.

Det rikaste landet i verda per innbyggjar

Når vi legg saman verdien av alt som blir bygd og laga og blir selde i eit land, får vi det som blir kalla BNP. Det er ei forkorting for bruttonasjonalprodukt. Her er Noreg langt, langt bak USA og Kina.

[Her kan du sjå eit diagram med dei 15 landa som har mest pengar i til saman](#). Noreg er langt bak på lista.

Men om vi deler det på alle som bur i landet, rykkjer vi heilt opp i toppen av lista. Dette kallar vi BNP per innbyggjar. Når nokon seier at Noreg er eit av dei rikaste landa i verda, er det BNP per innbyggjar dei tenkjer på.

[Her kan du sjå eit diagram som viser det rikaste landet i verda per innbyggjar](#). Noreg er nummer tre på lista.

Dette talet seier omrent kor mykje kvar og ein av oss har å rutte med. Det blir kalla gjennomsnitt.

Då er det berre nokre få land som kjem føre Noreg.

– Det er rett at Noreg er eit av dei rikaste landa i verda, seier Ola Grytten. Han er professor i økonomisk historie ved Noregs handelshøgskole.

Desse tala fortel ikkje korleis pengane er fordelte mellom dei som bur i eit land. I enkelte land er det nokre få som er veldig, veldig rike, og det er store ulikskapar mellom folk. Då kan mange vere fattige sjølv om gjennomsnittet er høgt.

I Noreg er forskjellane mindre enn i mange andre land.

Et verdenskart bygget opp av mennesker som står tetti-i-tett

Mange land har mykje meir pengar enn Noreg, men dei må også dele pengane på mange fleire menneske. Foto: Shutterstock

Har vi råd til alt?

Nokon meiner at mykje meir burde vere gratis i Noreg ettersom vi er eit av dei rikaste landa i verda. Til dømes har nokon foreslått at alle barn burde få gratis mat på skulen. Andre synest at det burde vere billigare å få behandling på sjukehus, at bensin burde koste mindre eller at alle skal betale mindre skatt til staten.

– Men om vi legg saman alt dette, så hadde vi ikkje vore eit av dei rikaste landa i verda, seier professor Grytten.

Viss staten får mindre pengar, samtidig som han må bruke meir på skular, sjukehus og vegar, går reknestykket i minus.

– Skal ein prioritere alt, så vil ein bli fattig, seier Grytten.

SAMFUNNSFAG ØKONOMI

Meldinger ved utskriftstidspunkt 1 juni 2025, 10:19 CEST

Det ble ikke vist noen globale meldinger eller andre viktige meldinger da dette dokumentet ble skrevet ut.